

DOMENIE IV DI AVENT

Antifone di jentrade Is 45,8

Risinait jù, cîi, di adalt
e i nûi che a fasin plovi la justizie;
che si sprechi la tiere e che al butuli il Salvadôr.

No si dîs Glorie a Diu.

Colete

Met, Signôr, la tô grazie tai nestrîs cûrs,
par che, daspò di vê cognossude midiant dal mes dal Agnul
l'incjarnazion di Crist to Fi,
pe sô passion e crôs,
o sedin compagnâts a la glorie de resurezion.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE 2 Sam 7,1-5.8-12.14.16

Il ream di David al sarà simpri denant dal Signôr.

Dal secont libri di Samuel

Cuant che il re al lè a stâ te sô cjase, che il Signôr lu veve deliberât di ducj i nemîs dulintor, il re i disè al profete Natan: «Viôt tu mo: jo o soi a stâ tune cjase di cedri e l'arcje di Diu e je sot di une tende!». Natan i rispuindè al re: «Va e fâs dut ce che ti sta in cûr, che il Signôr al è cun te». Ma però, ta chê stesse gnot, la peraule dal Signôr si fasè sintî di Natan cussì: «Va dal gno famei David e disii: il Signôr al dîs chest: Varessistu chê di fâmi sù une cjase che o ledi a stâ?

O soi jo che ti ài cjapât sù dai passons, daprûf des pioris, par che tu fossis il soestant dal gno popul Israel. O jeri cun te par dut là che tu levis; o ài splantât denant di te ducj i tiei nemîs. Ti darai un grant non, che ti metarà cui plui grancj de tiere. O destinarai un puest pal gno popul Israel, lu plantarai alì, al restarà in chest lûc, nol sarà plui sbalotât e i triscj le varan finide di tibiâlu come par vieri, ancjemò di cuant che jo o metevi i judiçs sul gno popul Israel; jo ti deliberarai di ducj i tiei nemîs. E il Signôr ti fasarà grant, parcè che il Signôr ti fasarà sù une cjase. E cuant che lis tôs zornadis a saran rivadis al colm e che tu ti sarâs distirât cui tiei vons, o tignarai sù daûr di te la semence saltade fûr des tôs vissaris e o rinfuarçarai il to ream. O sarai par lui un pari e lui al sarà par me un fi. La tô cjase e il to ream a saran simpri denant di me; la tô sente e je plantade par simpri».

Peraule di Diu.

SALM RESPONSORIÂL dal Salm 88

R. Il Signôr al è di peraule par simpri.

O vuei cjantâ il to boncûr, Signôr, cence polse,
di ete in ete cu la mê bocje o contarai trop che tu sês di peraule.

Parcè che tu âs dite:

«Il gno boncûr al è par simpri,
la mê fedeltât e je salde come il zîr des stelis. **R.**

O ài fat un pat cun chel che o ài sielzût,
i ài fat un zurament a David, gno servidôr:
La tô gjernazie e restarà in pîts par simpri,
ti fasarai sù une sente di une ete in chê altre. **R.**

Lui mi clamarà: Tu tu sês gno pari,
gno Diu e crete che mi pare.
I mantignarai par simpri il gno boncûr
e salde e sarà cun lui la mê aleance». **R.**

SECONDE LETURE Rm 16,25-27

Il plan misteriôs tasût dai secui eternos cumò al è pandût.

De letare di san Pauli apuestul ai Romans

Fradis, a di chel che al à il podê di sigurâus seont il vanzeli che o predicji e il mes di Jesù Crist, - seont la rivelazion dal plan misteriôs tasût dai secui eternis, ma pandût e fat cognossi cumò midiant des scrituris dai profetis, par ordin di Diu eterni, a ducj i popui par che a ubidissin a la fede, - a Diu unic sapient, midiant di Jesù Crist, la glorie tai secui dai secui. Amen.

Peraule di Diu.

CJANT AL VANZELI Lc 1,38

R. Aleluia, aleluia.

Ve la sierge dal Signôr:

che mi sucedi seont la tô perauale.

R. Aleluia.

VANZELI Lc 1,26-38

Ve, tu cjararâs sù tal to grim e tu parturissarâs un frut.

Dal vanzeli seont Luche

Tal sest mê, Diu al mandà l'agnul Gabriel intune citât de Galilee che i disin Nazaret, li di une fantate, imprometude a un om di non Josef de cjase di David: la fantate e veve non Marie. Al jentrà li di jê e i disè: «Ave, plene di gracie, il Signôr al è cun te». Sintint chestis peraulis e restà spauride e si domandave ce che al podeve volê dî un salût di chê sorte. Ma l'agnul i disè: «No sta vê pôre, Marie, parcè che Diu ti à agrât. Ve, tu cjararâs sù tal to grim e tu parturissarâs un frut. Tu i metarâs non Jesù. Lui al sarà grant e i disaran Fi dal Altissim; il Signôr Idiu i darà la sente di David, so pari, e al regnarà su la cjase di Jacop par simpri e il so ream nol finissarà par mai».

Alore Marie i disè al agnul: «Cemût sucedaraial dut chest, dal moment che jo no cognòs om?». E l'agnul i rispuindè: «Il Spirtu Sant al vignarà jù sore di te e la fuarce dal Altissim ti cuvierzarà cu la sô ombrene. Chel che al nassarà, i disaran sant, Fi di Diu. E ve che Elisabete, tô parint, e à cjapât sù ancje jê un frut seben che e je viele, e jê che le crodevin sterpe e je za di sîs mê; di fat nol è nuie che Diu nol puedi fâ». Alore Marie e disè: «Ve la sierge dal Signôr: che mi sucedi seont la tô perauale». E l'agnul si slontanà di jê.

Peraule dal Signôr.

Si dîs O crôt.

Su lis ufiertis

Acete, Signôr, i regâi che o presentin sul altâr

e consacriju cul to Spirt,

che al à jemplât cu la sô virtût il grim de sante Marie.

Par Crist nestri Signôr.

Antifone a la comunion Is 7,14

Ve, la Virgine e cjape sù

e e parturis un fi

e i metarà non Emanuel.

Daspò de comunion

Diu, che tu nus âs dade la capare de vite eterne,
scolte la nestre preiere:
plui si fâs dongje la grande zornade de nestre salvece
e plui la nestre religjon e cressi,
in mût di celebrâ in maniere degne il misteri de nativitât di to Fi.
Lui che al vîf e al regne tai secui dai secui.